

## VIJESTI



## EU i NATO jedini put BiH

Američki ambasador u BiH Patrick Moon jučer je posjetio Prijedor, Bosansku Krupu i Kozarac. Moon je tokom posjete Prijedoru istakao da je impresioniran planovima i projektima koje provodi ova lokalna zajednica, kao jedan od vidova promocije ekonomskog razvoja i otvaranja novih radnih mjesta. "Cilj američke ambasade i programa pomoći Vlade SAD-a jeste promocija zemlje u svrhu dobijanja kandidatskog statusa za članstvo u EU i NATO-u. Naše je stanovište da za ovu zemlju ne postoji drugi ostvariv put, i to će, dok se bude radilo na tome, ujedno promovirati i ekonomsku stabilnost", rekao je Moon poslije sastanka sa načelnikom Opštine Prijedor Markom Pavićem.

## Odbijena tužba Turističke zajednice

Kantonalni sud u Tuzli u utorak je donio rješenje kojim se odbija tužba Turističke zajednice TK-a protiv Vlade TK-a zbog odluke o raspuštanju Skupštine te institucije i imenovanju nove. U obrazloženju odluke ističe se da "akt koji se pobija tužbom nije upravni akt", zbog čega Kantonalni sud ne može odlučivati o njemu. "Ovo samo potencira da moramo nastaviti sa promjenama u TZ-u TK-a", kazao je Hasan Sejdinović, predsjednik Turističkog vijeća TZ-a, ističući da nakon odluke suda očekuje odlazak Alamazage Čatovića sa pozicije direktora TZ-a. **A. Še.**



## Prilika za novo poglavlje u BiH

Ambasador Velike Britanije u BiH Nigel Casey vjeruje kako sada u BiH postoji prilika za napredak u procesu evropskih integracija. "Vjerujem da sada postoji prilika za okretanje stranice i započinjanje jednog novog poglavlja", kazao je ambasador Casey nakon jučerašnjeg razgovora s predsjednikom Narodne skupštine RS-a Igorom Radojičićem. Podsjetivši da je Peter Sorensen preuzeo dužnost, britanski diplomat je kazao da specijalni predstavnik EU nudi partnerstvo u kojem Unija podržava političke vođe u našoj zemlji na njihovom putu ka evropskoj zajednici. Radojičić je rekao da trenutno postoji nešto malo više optimizma u razgovorima u BiH.

## Helsinška komisija Kongresa SAD-a o situaciji u BiH

# Ne vidi se izlaz iz postojećeg stanja

Posljednjih godina u porastu je nacionalistička retorika, kao i sve izraženija nespremnost za konstruktivniji rad sa predstavnicima međunarodne zajednice, što podriva državnu stabilnost i teritorijalni integritet BiH, cijeni kongresmen Smith

Politička situacija u Bosni i Hercegovini već nekoliko godina se pogoršava i trenutno stanje je najgore od okončanja rata. Ne postoje šanse za ponovni oružani sukob, ali se ne vidi izlaz iz postojećeg zastoja u zemlji.

Ovu ocjenu iznio je Clifford Bond, bivši ambasador Sjedinjenih Američkih Država, na saslušanju o trenutnoj situaciji u BiH pred Helsinškom komisijom za sigurnost i saradnju u Evropi u Kongresu SAD-a održanom krajem jula.

### Aktivno učešće SAD-a

SAD su prepustile vodeću ulogu u BiH Evropskoj uniji, koja ima poteškoće u provođenju politike u BiH i koja je previše pasivna u odgovorima na krize. Sama perspektiva članstva u EU nije dovoljna za provođenje reformi i neophodne političke kompromise. Početkom godine pojavile su se špekulacije da EU razvija paket sankcija kao odgovor na antidejtonske akci-



Clifford Bond: EU ne može sama

je, odnosno na blokadu i usporavanje bh. integracijskih procesa u Evropu. Ostalo je nejasno da li uopšte postoji konsenzus članica EU za primjenu eventualnih sankcija. Zbog svega toga SAD moraju aktivno ostati uključene u BiH uz punu saradnju sa EU i njenim članicama, ocijenio je Bond.

On je istakao kako "ustavne promjene ne trebaju biti prioritet nove državne Vlade, nego da to treba da budu ekonomija i



Chris Smith: Zemlja trpi

unapređenje stranih investicija, borba protiv korupcije i rješavanje pitanja vojne imovine".

Preporučio je pojačano prisustvo EU u BiH koje, između ostalog, podrazumijeva "stvarni autoritet novog specijalnog predstavnika EU u formiranju i provođenju politike EU u BiH". Ambasador Bond založio se za imenovanje specijalnog američkog izaslanika za zapadni Balkan koji bi, između ostalog, "imao za cilj bolju koordinaci-

**PRIORITETI** Ustavne promjene ne trebaju biti prioritet nove državne Vlade, nego to treba da budu ekonomija i unapređenje stranih investicija, borba protiv korupcije i rješavanje pitanja vojne imovine, ističe ambasador Clifford Bond

ju ne samo između Washingtona i Bruxellesa nego i SAD-a i pojedinih država članica EU, kao i sa Turskom i Rusijom".

Imenovanje specijalnog izaslanika SAD-a za zapadni Balkan, kao jedno od rješenja za izlaz iz političke krize, podržao je i Kurt Bassuener, politički analitičar i član Vijeća za demokratizaciju politike koji je, također, predložio da naredni visoki predstavnik u BiH bude Amerikanac.

## Uspostava vlasti u Hercegovačko-neretvanskoj županiji

# HNS je sve zaustavio

Povezivanje uspostave vlasti u HNŽ-u i SBŽ-u je neprihvatljivo, upozorava Aner Žuljević, predsjednik KO SDP-a

Proces uspostave vlasti u HNŽ-u je trenutno zamrznut, iako je bilo najavljavano kako bi ova županija u petak trebala dobiti novu vlast. Aner Žuljević, predsjednik Kantonalnog odbora SDP-a za HNŽ, rekao je za Oslobođenje kako je potvrđivanje nove Vlade HNŽ-a zamrznuto zbog naloga Hrvatskoga narodnog sabora da se formiranje vlasti u toj županiji poveže s uspostavom vlasti u Srednjobosanskoj županiji.

### Neodgovoran potez

Mi i dalje idemo da unutar stranke završimo sve ono što nam je obveza, kako bismo, onog trenutka kada se ovaj proces odmrzne, za 48 sati mogli uspostaviti vlast. Također, riješit ćemo i podjelu resora s SDA. Međutim, ovaj potez HNS-a je konačno razotkrio ono što je u

javnosti već bilo nagađano, iako sam u pregovorima više puta bio uvjeren da uspostava vlasti u HNK-u i SBK-u nije povezana. Pokazalo se kako je to bilo izbjegavanje istine i pokušavanje maskiranja tog procesa, koji jeste bio povezan unutar tih struktura, kazao je Žuljević.

Istaknuo je i kako je povezivanje uspostave vlasti u HNŽ-u i SBŽ-u za SDP neprihvatljivo, te kako stranke Platforme to vide kao vrlo neodgovoran i nekoristan politički potez.

Ne vidim nikakvu korist u cijeloj ovoj priči, osim rješavanja nekih ličnih interesa najvećim dijelom HDZ-a 1990, koji su i izborni gubitnici. HDZ BiH je HDZ-u 1990 dao više prostora nego što im to izborni rezultat dopušta i to je najveći dio problema u pregovorima o uspos-

tavi vlasti u HNK-a. HDZ 1990 je doveden u ravnopravan položaj s HDZ-om BiH, a za to nema temelja u izbornom rezultatu, izjavio je Žuljević.

Otkrio je i kako je u utorak trebao biti potpisan koalicijski sporazum između dva HDZ-a, SDP-a i SDA temeljem kojega bi uspostavila vlast u HNŽ-u.

### Problemi se nižu

Imali smo sastanak sa SDA i dva HDZ-a, na kojem smo trebali potpisati koalicijski sporazum. Predsjedništvo SDP-a je bilo dalo i saglasnost na potpis tog dokumenta, no tada je HNS odlučio da se sve zaledi. Ništa nije prekinuto, nego je samo zaustavljeno. Do kraja sedmice se ponovno trebamo sastati kako bismo vidjeli što se može uraditi, kazao je Žuljević.

Također, mišljenja je kako



Aner Žuljević: Slijedi novi sastanak

HNS treba javnosti objasniti zbog čega je zaustavljena uspostava vlasti u HNŽ-u, te kako nije jasno zbog čega SBŽ i HNŽ trebaju zajedno dobiti novu vlast.

Za nas je to neprihvatljivo jer u mi HNK-u imamo svoje, a SBK, pak, ima svoje probleme, rekao je Žuljević.

Podsjećamo, početkom tjedna je objavljeno kako Predsjedništvo HNS-a traži žurnu uspostavu vlasti u HNŽ-u i SBŽ-u, ali i da insistira da se vlast u te dvije županije formira istovremeno, odnosno u paketu.

J. GUDELJ

## VIJESTI



## Suživot u vjerskoj različitosti

U okviru trodnevnog obilježavanja jubilarne 200. obljetnice Univerziteta u Oslu, reisu-l-ulema Mustafa Cerić i dr. Olav Fykse Tveit, generalni sekretar Svjetskog vijeća crkava, održali su uvodna predavanja o temi Religija - izvor konflikta ili put do pomirenja, u prisustvu velikog broja akademskih i kulturnih ličnosti Norveške i Evrope. Nakon izlaganja dvojice visokih predstavnika islama i kršćanstva u Evropi, otvorio se zanimljiv međuvjerski dijalog u kojem su Cerić i Tveit naglasili važnost kršćansko-muslimanskog razumijevanja za mir i stabilnost u Evropi. "Jedno je izvjesno, islam i kršćanstvo su prisutni u Evropi i zato niko nikoga ne može ignorirati, već mora shvatiti da suživot u vjerskoj i kulturnoj različitosti nema alternativu", kazao je Cerić.

## Obnova 28 kuća za Rome

Ministarstvo za ljudska prava i izbjeglice BiH osiguralo je 600.000 KM za izgradnju ili obnovu 28 kuća za romske porodice u općinama Tuzla i Banovići. Ministar Safet Halilović jučer je u Tuzli i Banovićima s načelnicima ovih općina Jasminom Imamovićem i Begom Birparićem, te s Romima kojima je namijenjen ovaj novac, potpisao ugovore za realizaciju tog projekta. Kako je saopćeno iz Ministarstva, u Tuzli će, prema ugovoru, biti izgrađeno ili sanirano 15 kuća, a u općini Banovići 13. Implementator oba ova projekta, ukupne vrijednosti 696.000 KM, Hilfswerk-Austrija.



## Oснаžiti civilno društvo BiH

Ured za odnose s javnošću Ambasade SAD-a u Sarajevu bit će domaćin okupljanja i konferencije o liderstvu za učenike i profesore srednjih škola koji su sudjelovali u Youth Leadership Programu u periodu od 2008. do 2011. godine. Konferencija će okupiti oko 70 učenika i profesora, a sudionici konferencije su iz Banje Luke, Tuzle, Livna, Tomislav-Grada, Bihaća, Širokog Brijega, Orašja i Bijeljine. Cilj konferencije je osnažiti mlade aktiviste uključene u Youth Leadership Program za budući angažman u zajedničkim građanskim inicijativama koje će razvijati bh. civilno društvo. Konferencija će biti održana sutra na Jahorini.



Sve dublje podjele i unutar članica PIC-a



Kongres SAD-a: Zabrinutost situacijom u BiH

Kongresmen Chris Smith, predsjedavajući Helsinške komisije za sigurnost i saradnju u Evropi u Kongresu SAD-a, ocijenio je da "bosanska politika, uprkos naporima na ohrabrivanju povratka, i dalje ostaje podijeljena duž etničkih linija".

### Višegodišnji zastoj reformi

- Političke partije nisu bile u stanju da nakon izbora u oktobru 2010. formiraju Vladu na

državnom nivou. Posljednjih godina u porastu je nacionalistička retorika, kao i sve izraženiji nespornost za konstruktivniji rad sa predstavnicima međunarodne zajednice, što podriva državnu stabilnost i teritorijalni integritet BiH. Lideri RS-a, u želji da zadrže vlast, posebno se opiru promjenama. Kao rezultat takvih aktivnosti, cijela zemlja trpi posljedice i zaostaje na putu za Evropu, upozorio je kongresmen Smith.

On je ocijenio kako "SAD i Evropa ne mogu prihvatiti trenutno stanje u BiH, te da narodi Bosne i Hercegovine zaslužuju da dobiju mnogo više od izabраних званиčnika i međunarodne zajednice".

Član Vijeća za demokratizaciju politike i politički analitičar Kurt Bassuener naveo je da "zastoj u provođenju reformi traje od 2006".

- U ovom periodu nacionalistička retorika je dobila na sna-

zi, a političari su počeli dovoditi u pitanje pretpostavku da neće biti dozvoljen raspad zemlje. Upravo nedostatak međunarodne političke volje prouzročio je podjelu unutar međunarodne zajednice i unutar zapadnih zemalja članica PIC-a. Linije podjela pojavile su se prije dvije godine i sada su još vidljivije, ocijenio je Bassuener.

Naveo je da su "sa jedne strane Njemačka, Francuska i Italija i, na opće iznenađenje, Rusija, koje su zagovornici teorije da je sama perspektiva članstva u EU dovoljna za stabiliziranje političkih procesa unutar BiH". U drugu grupu država koje su "skeptici takvom pristupu" naveo je SAD, Tursku, Veliku Britaniju, Kanadu, Japan i povremeno Nizozemsku.

Informaciju o stavovima iznesenim na Helsinškoj komisiji Kongresa SAD-a Ministarstvo vanjskih poslova BiH dostavilo je Predsjedništvu i Parlamentarnoj skupštini BiH.

Almir TERZIĆ

## Zasjedalo Predsjedništvo Stranke demokratske akcije

# Samo sa SDP-om u Vijeće ministara

Zaključeno je da treba ići ka rješenju i da je nužno da BiH dobije vladu

Predsjedništvo Stranke demokratske akcije je na jučer održanoj sjednici dalo podršku predsjedniku stranke Sulejmanu Tihiću u toku pregovora o formiranju državne vlade.

### Evropski voz

Predsjedništvo stranke je prihvatilo prijedlog mogućih rješenja koja će biti razmatrana na narednom sastanku predstavnika vladajućih političkih partija, saopćeno je iz SDA po okončanju sjednice Predsjedništva.

Zakoni iz evropske agende (zakon o imovini, zakon o državnoj pomoći i zakon o popisu stanovništva), o kojim je načelno već postignuta politička saglasnost, te formiranje državne vlade, bili su teme o kojim je raspravljano na jučerašnjoj sjednici Predsjedništva SDA, a bit će i tema pregovora šestori-

ce političkih lidera 26. septembra ove godine u Brčkom.

- U Bosni i Hercegovini je uvijek neophodno sastajanje, razgovaranje, a onda i postići rezultat. Zaključeno je da treba ići ka rješenju i da je nužno da BiH dobije vladu. Predsjedništvo je zaključilo da dadne saglasnost da se krene sa usvajanjem tih zakona. Mi se moramo priključiti evropskom vozu, za kojim već kasnimo, kazao je generalni sekretar i član Predsjedništva SDA Amir Zukić.

Kako saznajemo u Predsjedništvu SDA, jučer je zauzet stav da, u slučaju istupanja Socijaldemokratske partije BiH iz pregovora o formiranju Vijeća ministara, u njima neće učestvovati ni SDA.

SDA insistira da se fondovi IPA za ovu godinu iskoriste, jer bi u suprotnom BiH izgubila 340 miliona eura za ovu i narednu



SDA insistira da se fondovi IPA za ovu godinu iskoriste

godinu, zbog čega bi i njezin evropski put bio usporen.

### Priprema institucija

- Što se tiče IPA fondova, građanima treba biti jasno da oni neće popraviti socijalnu situaciju u BiH. Većinu tih sredstava uzet će konsultanti, ali oni moraju pripremiti institucije i pojedince da funkcionišu u Evropskoj uniji. Ako to ne bude sada, naredne godine nećemo aplicirati, a treće godine nećemo

imati pripremljene institucije i ko zna koliko ćemo izgubiti. I u tom smislu, treba da ide odluka Vijeća ministara koja je usaglašena. Naredne godine će biti novo apliciranje i sa 88 ići će se na 340 miliona eura, kazao je Zukić.

Predsjedništvo SDA jučer je utvrdilo i prijedlog pravila izbornog postupka u stranci, a zaključeno je i da će se 15. oktobra sastati Glavni odbor SDA.

J. F.